

Petritsch: "Bez Srbije je nemoguće riješiti problem Bosne i Hercegovine"

S. B.

07. 07. 2009. • 19:05



Wolfgang Petritsch / ap

24SI - Bivši međunarodni predstavnik u BiH Wolfgang Petritsch rekao je danas da je bez Srbije nemoguće riješiti problem BiH. On je rekao da će u budućnosti Srbija imati važnu ulogu na Balkanu.

Ambasador Austrije pri Organizaciji za ekonomsku saradnju i razvoj je na promociji knjige "Srpske prilike - domaće reforme i evropska integracija" koja je održana u Beču apelovao na Srbiju da se realno suoči sa prošlim ratovima.

"Kada se to desi i ovaj dio Evrope će biti potpuno miran i evropska integracija Balkana će biti samo tehnički problem. Trenutno je politički problem", rekao je

Petritsch, osvrćući se na problem Kosova i na probleme u BiH.

Petritschje kritikovao EU zbog viznog režima prema balkanskim zemljama i izrazio nadu da će taj problem uskoro biti riješen. On je uvjeren da će nakon rješenja problema Lisabonskog sporazuma u Uniji, za vrijeme predsedavanja Švedske, biti oživljena Solunska agenda o zapadnom Balkanu.

"Zemlje regiona moraju da sprovedu potrebne reforme, od kojih se neće odustati", poručio je Petritsch.

Knjiga "Srpske prilike - domaće reforme i evropska integracija" sadrži 26 političkih eseja o periodu nakon vladavine Slobodana Miloševića u Srbiji.

Autori su ugledni akademici, političari i analitičari, među kojima su bivši italijanski ministar Giuliano Amato, bivši austrijski vicekancelar Erhard Busek i nekadašnji šef jugoslovenske diplomatije Goran Svilanović.

Ova knjiga je dio serijala izdavačke kuće "Nomos" posvećenog jugoistočnoj Evropi koja će do kraja godine objaviti knjige "Etnička politika u BiH: država i društvo u krizi" i "Konflikt i pamćenje: premošćavanje prošlosti i budućnosti u (jugoistočnoj) Evropi".

(srna)